

LOGO BADA TIGISIM NABIINA DWE-LAO WADE

PULIM

De na se we nabiina gwea de logo bapa chega chwoŋa wade maama kugu zege logo maama wopwolo, de chega de yezura bapa ne.

De na se we de na ba tɔge chega chwoŋa to mo jaane nikantaga de tigura de popora ko twi nabiina laŋa ne, ye nabiina maama yaa lage se wopwolo de yezura yaa taa wora.

De na se we noono maama taa tei o tete se tigura de popora ye taa wora, fefe de peenem gwaane, se wade sem ja kuri.

De na se we teene maama taa jege wolim, de ni seem de mimoro.

De na se we “UN Charter” tɔno kom pape ko se wade sem gwea wolim gwaane se baara de kaana taa ye bedwe logo ywonni de wopwolo de yezura gwaane.

De na se we UN Tigisim teene dem maama ke nimoro se chega chwoŋa wade sem ja kuri nabiina zula de wopwolo gwaane.

De ta na se we ko yaa lamma lanyerane se de ni wade sento kuri se ko ja wopwolo de yezura ko ba logo bapa.

De Laam wo se we

“General Assembly” dem pe

Logo Bapa Tigisim Wade sem se ko taa ye won-kolo kodo na wo woli ko ja wopwolo de logo fagem de yezura na wo pa nabiina gwea taa jege kuri logo bapa maama ne to.

Wadaa 1

Ba loge noona maama se ba taa ye bedwe mo ba gwea de ba chega seini, ye fefe teira kotaa. We pe ba swa de bobona mo se ba taa ye nubi daane ye ba jege da gwaŋa.

Wadaa 2

Logo bapa tigisim wade sem pe chwoŋa se noono maama taa jege chega chwoŋa na wo pa ba gwea taa jege zula to. Wade sem ta we ba ba fee nabiinu o chega chwoŋa ne naa ba cheese o dwi o yetana, o logo lane, o we joono naa o bobona gwaane. Wade sem ta we ba ba jege se ba taa cheese noono we o ye baaro naa kaane, kwoo o jejegero naa ba na loge o me to gwaane.

Wade sem ta tage se woli da we popora ba jege se ka taa wora nabiina laŋa ne ba teo politiksi naa ko wade naa ko na ye kolo to gwaane. Naa ba poore noono we o nwoŋi teo kolo ta na wo vere ko tete to gwaane.

Wadaa 3

Ko ye noono maama chega chwoŋa mo se o taa gwe ye fefe naa foone teira.

Wadaa 4

Wadaa kam we nabiin-yeiku naa kabe totoga naa kabe pipio daa ye taa wora logo bapa ne.

Wadaa 5

Ba ba jege chwoŋa se ba pa noono yaare cham yerane ko na wo mape se nabiinu yaare tei to.

Wadaa 6

Noono maama ye nabiinu mo o ze pan o wo me maama logo bapa yoba. Logo bapa wade sem maama yiga ne, wadaa teira na wo ta we o dae nabiinu.

Wadaa 7

Nabiina maama ye bedwe mo wadaa yiga ne. Wadaa choo noono maama mo; ka ba poore noona ka yaga. Ka kwoli nabiina maama mo se wolo wolo ye cheese o dwon.

Wadaa 8

Noono maama wae o sanj noono o dwon kɔte delo maama wone neneene ko tu na ke o choge teo kom wade selo na pa noono wom gwea ywona to.

Wadaa 9

Ba baa wane ba ja noono yɔo yerane ba gare ba ke o peena diga naa ba zeili o o teo ne pa o vo zora te-gaa ne.

Wadaa 10

Ba na jaane noono fee wora se ba di o sareya kɔte ne lanyerane ko manj de teo kom wade na tini tei to ba ni o seene o choge naa o wo choge.

Wadaa 11

Ba na jaane noono we o choge o mape waarem ba na wo di o bora tata ba ba jege chwoŋa ba te we choge fee wora se ba pa ko tu chwoŋa se o ja loya de sareya tiina se ba woli o se ba di taane dem kɔte ne.

Ba baa wane ba ta we noono yaa ke o choge naa ba ta we o ve se o yaa ke kolo na mape keim chega chwoŋa ne to, ye ka mape ne wadaa yaa teira ko gwaane. Ko kwaga ne tata ba baa wane ba pa noono waarem na dage de dwoi waarem delo dwi o deim yaa na wo jwon o na choge mape kalo to.

Wadaa 12

Ba ba jege chwoŋa ba daane noono yɔo yerane o bobona keiri seini, naa o diga tiina, naa o sɔŋa de o pwola totoga seini. Ba nam ba jege chwoŋa ba ke o kekeo kolo na wo choge noono wom yu to. Wadaa kanto choo noono maama mo o kekeo maama seini, ye daanem teira.

Wadaa 13

Noono maama wae o beiri o bobona na lage tei ye o zoore o bobona na lage me maama to, o teo ne.

Noono maama wae o nwoŋ teo de teo, naa o tete teo ne o beiri o vei teo kodwon ye o jwoora.

Wadaa 14

Noono wolo maama na ne chem o teo ne, o wane o duri o vo o taa zoore sateene dedwonna ne o wopwolo de yezura gwaane.

De ko de, o cham dem na dae neneene politiksi laŋa ne ko wo taa chamma se o duri o nwoŋ. O na choge teo kom wade ge mo naa o kekeo kom na wo de UN wade sem na mape tei to sateene dedwonna baa se de jwon o male mole.

Wadaa 15

Noono maama jege teo, o na nwoŋ me.

Ba baa wane ba zeili noono o teo ne, naa ba fee o se o ye leiri teo o bobona na lage tei to.

Wadaa 16

Baara de kaana na bege ba ti to wae ba di daane ye ba yetana, naa ba na nwoŋ tekolo, naa ba na tɔge Wechona kalo dwi to baa wane ko cheŋi ba se ba ye di daane ba lo sɔŋa. Ye ba kadiri seini ba maama ma daane, ba zora de ba gwea seini, ye ba wae ba yage daane mape de mape, ba tete bobona na lage tei.

Kadiri wio ye baaro de kaane tete yerane na se se ba zo daane, ye ko dae we noono mo fee ba to.

Sɔŋa tiina – baaro de o kaane de o bu – mo ye sayu kugu takeiri wone. Konto gwaane tekeiri dem de teo kom maama jege se ba taa ni ba bapa ne mo, ba taa choo ba wolwanno maama wone.

Wadaa 17

Nɔɔno maama wae o jege o tete nyɔɔne wonno, naa o de o badwonna wae ba tei wonno daane.

Ba baa wane ba vere nɔɔno wonno naa ba pa se o ye taa lage wonno.

Wadaa 18

Nɔɔno maama wae o boŋ o na lage tei. O wae o ke o boboŋa keiri, o wae o tɔge Wechwɔŋa kalo dwi o na lage to; o nam ta wae o leiri o Wechwɔŋa naa o boŋem o yerane naa o de kɔgɔ, ye o bere nɔɔna Wechwɔŋa kam o taane de o tototɔŋa seini.

Wadaa 19

Nɔɔno wae o ŋɔɔne o boboŋa na lage tei. O wae o tɛ kolo maama o na boŋe o yu ne, ye nɔɔno ba jege chwoŋa se o cheiŋi o ni. O wae o beiri labaare o boboŋa o daare o pae labaare dwi maama labaare tɔnno de walese bam maama wone se de jage jei mamma.

Wadaa 20

Nɔɔno maama wae o tɔge o zoore asemble naa tigiŋim dwi maama na ye yezura tigiŋim to.

Ba baa wane ba fee nɔɔno se o zo tigiŋim delo o na ba lage to.

Wadaa 21

Nɔɔno maama wae o tɔge o di o teo gɔmente paare; o nam ta wae o tɔge o voti o kuri nɔɔna o ke gɔmente dem wone.

Nɔɔno maama wae o jwoŋ wolim delo o teo gɔmente na jege de woli de nɔɔnbia maama to, ko ma da ko ma da.

Gɔmente maama dam wo taa tɔge de nɔɔnbia kwora na we tei to mo. Nɔɔnbia bam kwora kam mo yei ni ka bere nɔɔnbia bam na wo kuri ba gɔmente dem paare tiina tei to. Kurim dem jege se ko dɛ voti laɔ naga mo, se nɔɔno maama voti o boboŋa na laga tei to, ye se ko de voti wadaa kam naga chekke.

Wadaa 22

Nɔɔno maama teo gɔmente jege se de taa choo o ŋwea laŋa ne de de dam, de de naduni dedaane de na jege nimɔɔɔ tei de sateene dedwonna to se ko pa nɔɔno wom ŋwea ja kuri se o wane o ji nɔɔno lanyerane.

Wadaa 23

Nɔɔno maama wae o ke tototɔŋ; o wae o kuri o boboŋa na dɛ tototɔŋ delo, ye fee wora se tototɔŋ dem taa jege kuri na pa o ywonni de wopwolo ye o ba lia we ba wo zaŋ ba le o tototɔŋ dem ne to.

Nɔɔno maama ka, ye ko ba chuli o na ye wolo dwi to, jege se o taa jwoŋ ŋweo na mae de o tototɔŋ dem dam na mae tei to mo.

Wolo maama na totɔŋ ko maŋ se o ŋweo taa ye zegere se ko wane ko ni o tete dedaane o diga tiina lanyerane. Ko ta maŋ se o taa nɛ fee o tototɔŋa jei ne.

Nɔɔno maama wae o tɔge o zoore tototɔŋa jei tigiŋim yalo na wo woli o o tototɔŋa laŋa seini to.

Wadaa 24

Nɔɔno maama jege chwoŋa se o taa jege sio de sio maŋa, dedaane hawase bagera o na o ke tototɔŋa jei ne to; ye o ta wae o jwoŋ daa bem wone o jeini sɔŋɔ ne o sia ye ba baa le o ŋweo wone.

Wadaa 25

Fee wora se nɔɔno maama taa ŋwe ŋwea na jege kuri ye ka ywoma ka pae o tete de o diga tiina to. Ko maŋe se wodiiru, zora jei, assibita na ni yezura seini to dedaane won-telo maama na wo woli pa se ŋwea taa ywoma to taa wora. Fee ta mo wora se wolim taa wora ko pae nɔɔno maama nenɛne o na ba totɔŋa, o na weela, naa o na jigi nabwom jaweo ŋwaane, o na ye badeim naa kadeim, o na kwe naa nɔɔno na ye zore tu, o ware se o ni o tete baŋa ne.

Fee wora se ba taa fage ba ni niina de bia baŋa ne lanyerane. Bu maama, o jege kwo yoo o ba jege kwo yoo, ko maŋe se ba ni o baŋe ne mo ba woli o se o ke nɔɔno.

Wadaa 26

Nɔɔno maama jege choŋa se o ke sikuuli. Sikuuli veiŋa, ko zege prameiri sikuuli ko vo yi Junia Sekondeiri Sikuuli, wo taa ye zɛɛra mo, ye ko ta ye fefeo mo se bu maama vo sikuuli se ko yi konto. Tekenekal Sikuula de tototɔŋa berem sikuula nenɛne Kɔleja de wo taa wora se balo na wo vo da to vo. Univesiti de sikuula kamuna yadwonna de wo taa wora se balo na paase ba tɛsa lanyerane to vo.

Sikuuli veiŋa naa tɔn-yeino ye se ko pa nɔɔno swa mo poore se o wane o lore kolo maama na lana ko pa nabiino se ko ja wopwolo de yezura ko ba to. Ko jege se ko ja nimɔɔɔ de badwoŋo mo ko ba de sateene logo baŋa ne, de nabiina dwi maama de wɛjɔɔna dwi maama se ko zeini logo baŋa tigiŋim tototɔŋa dwi maama na woli logo maama yezura to.

Tiina jege chwoŋa se ba kuri ba na wo taa lage se ba bia zameŋe tɔnɔ sikuuli delo dwi wone to.

Wadaa 27

Nɔɔno maama wae o tɔge o ke o nabaara kekeo o na lage tei, de keina yadwonna, de “Science” na jaane wodonno telo maama ko ba nabiina jirim naa wolim ŋwaane to.

Nɔɔno maama na popone o tɔnɔ o na yei kolo maama logo lam ŋwaane to, fee wora se ba zeini naa ba woli o se o nɛ ko maana.

Wadaa 28

“United Nations” nia yanto ye se ko pa nabiino maama logo baŋa wolim, de wopwolo de yezura mo.

Wadaa 29

Nɔɔno maama jege fee tototɔŋa se o ke o na zoore takeiri delo maama ne to se ko pa se o taa ye nɔɔn-ŋwem se o ŋwea ke ywonni.

Nɔɔno fee tototɔŋa keiri wone o jege se o dɛ wade sem na lage tei to mo. O ba jege se o ke o gaale naa o ke o chɔge badwonna wo. O nam ba jege chwoŋa o ke o chɔge kɔgɔ ywonni de nɔɔno wopwolo, kɔgɔ zula ŋwaane.

Nɔɔno maama na tɔge nabiina ŋwea de logo baŋa chega chwoŋa wade sento o jege se o tɔge “United Nations” na lage se ko dɛ tei to mo.

Wadaa 30

Nɔɔno, naa nɔɔna, naa teo ye zaŋ ba boŋe we ba wo wane ba ke wogo se ko leiri naa ko chɔge nia yanto ba na tiŋ tɔnɔ konto ne to.